

S. F. N.

DISSERTATIO GRADUALIS
DE
VITIIS
SERMONI S. CODICIS
SPECIATIM
N. FOEDERIS & PAULI EPISTOLIS
AFFICTIS,

QUAM

*Indulgente Amplissimo Ordine Philosophico in Regio
ad Auram Athenæo*

P R A E S I D E

VIRO Maxime Reverendo atque Celeberrimo

D:no ISAACO ROSS,

S. S. L. Professore Reg. & Ord.

Publico Examini modeste submittit


ELIAS ALCENIUS,

Verbi Divini Minister.

In AUDITORIO MAJORI die III. Decembr.
Anni MDCCLXVIII.

Horis Antemeridianis.

ABOÆ, Impressit JOH. CHRISTOPH. FRENCKELL.



§. I.

Patres Veteris Ecclesiæ sinistrius de stilo Scriptorum Sacrorum judicasse, noto est notius. Causæ in propatulo sunt. Scilicet haud pauci eorum Græce aut plane non, aut non sufficienter docti erant. Alii verborum Sacrorum nullam fere cumram habentes rebus gravissimis pene unice inhærebant. Huc præter reliquos referre liceat **CLEMENTEM ALEXANDRINUM**, **ISIDORUM PELUSIOTAM**, **CHRYSOSTOMUM**, **THEODORETUM**, **ARNOBIUM**, **LACTANTIUM**, **THEOPHYLACTUM**. Juvat exempli loco afferre ARNOBII verba, quibus de sermonis vitiis Sacro Codici objectis & in eo inveniendis locutus ea ultro concedit: *puerilis inquit & angusti pectoris reprehensio!* *Quam si admitteremus, ut vera sit, abjiciamus ex usibus nostris quorundam fructuum genera, quod cum spinis nascentur & purgamentis aliis, quæ nec alere nos possunt, nec tamen impediunt perfrui nos eo, quod principaliter antecedit, & saluberrimum voluit nobis esse natura.* (a) Dolendum autem maxime **HIERONYMUM**, Patrum eruditissimum, neque ex hac cohorte eximi voluisse, ceu deinceps

deinceps patebit. Ad stilum Veteris Testamenti seu Sacri Codicis Hebræi quod attinet, non defuerunt homines, ex ipsis etiam Judæis, quod mireris, tam insignis proterviæ, ut illum variis vitiis laborare contenderent. In his principatum facile gerit IS. ABARBANEL, qui Prophetas interdum ipsam lingvam non satis intellexisse, atque in rebus Grammaticis & Orthographia rite instituenda parum fuisse exercitatos cavillatur. In JEREMIAM tamen præcipue insurgit multa eum vitiouse scripsisse per lapsum vel errorem ganniens, quæ deinde EZRA correxerit explanatione, quæ lingvæ indoli conveniat, margini adscripta, quod decem exemplis corroborare annisus est. (b) Nec mitiorem multo de Propheta habet opinionem RICHARDUS SIMON, quem de eo hunc in modum non pudet scribere: tot in illius textu phrases concisæ aut mutilæ occurrunt, ut non nisi multa splendo vocabula aut periodorum ordinem invertendo, ut primas & nativas restituas, sensum adsequi, aut reddere possis. Quæ quidem res etiam aliqua ex parte ex proprio cuiusque auctoris stilo oriri potest. (c) JOHANNES CLERICUS iisdem contumeliis stilum Scripturæ Divinum profcindit, scabritiem & scribiginem, nescio quam, eidem affingens ad I. Sam. XXV: 31.

(a) Videatur Lib. I. adversus gentes pag. 45. (b) Præfat. ad Jeremiam Fol. 96. Col. 4. Lin. 4. seqq. Ad Soloecismum V. Testamenti refert Abarbanel ex Jera 2: 15. verba עירין כעתה que vertit urbes incensa est, unde concludit Jeremiam contra Grammaticam peccare. Ast reponimus 1:0 illud: mentiris Cain.

Nam in optimis codicibus impressis, qualis ille Michaelis est, habemus Kybbutz sub littera נ in verbo נצחה, sic recte reditum incensæ, succensæ sunt, quod etiam in notis facit, quem diximus, beatus vir doctus. Cessat igitur omne vitium Grammaticum, si ponamus a Radice נ צה vocem hanc oriri, sicut etjam cthib legitur נצח, adeoque intelligitur Kybbutz adhiberi pro נ. Sed simus 2:do liberales, legamus secundum literas cum (:) sub נ ut emergat hic sensus: Urbes ejus succensa est. Quid vero inde? Annon in aliis linguis, cum primis Hebraea ad distributionem designandam, istam legendi rationem esse usitatissimam, est notissimum? Eoque significaret Deus unamquamque urbium populi Israëlitici ab hostibus extendam esse. (a) Histor. Crit. V. Test. Lib. I. Cap. IV. pag. 29. At cthib, obseruante Michaele, verti etjam potest; desolata sunt, נצח, C. 4:7. Sic LXX, Jon. & Syr.

§. II.

Dictionem autem Novi Testamenti longe plures sunt aggressi. ERASMUS ROTERODAMUS in illa *Barbarismos & Soloecismos* se detexisse existimat. (a) Nonnulli perhibent Evangelistas & Apostolos sententias suas alia lingua animo conceperile, alia, cum scriberent, expressisse. BALTHASAR STOLBERGIUS adfert verba JOHANNIS CROJI, huc spectantia, in "Tractatu de Soloecismis & Barbarismis Græcæ Novi Foederis dictioni falso tributis, "quæ inde huc transferamus, e re est. *Evangelistæ* inquit & *Apostoli Syriaca lingua*, quæ tunc temporis in *Judea* familiaris erat, ut & ipse *Christus*, utebantur. De hac re inter omnes convenit *Judeos & Christianos*. *Græce* tamen scripserunt, quod lingua græca omnibus gentibus fere esset

5

effet familiaris. Hebraice & Chaldaice e libris Scripturæ Sacrae, vel ex eorum paraphrasi, quæ tunc communi in usu Judæorum versabatur. Syriace vero e patria dialecto, ea quæ erant scripturi, mente prius quidem concipiebant, atque ita eorum sententiae in animo erant Hebraicæ, aut Chaldaicæ, aut Syriacæ: deinde vero ut ea, quæ animo conceperant, explicarent, voces græcas ad mentem atque usum suum quærebant atque accommodabant. Atque ita factum fuit, ut voces quidem, quibus utebantur, fuerint græcae, earum vero significatio, vis, accommodatio & constructio fuerint Hebraicæ, aut Chaldaicæ & Syriacæ. (b) GOCLENII sententia eoredit: Spiritum Sanctum voluisse Apostolos uti lingua communī, quæ apud populum iūm erat corrupta, ut rudi vulgo se accommodarent, (c) indeque Soloecismos in scriptis eorum provenisse. Facere autem nequeo, quin ingentis simulque vehementi animorum motu inter viros doctrina præstantes ante medium superioris seculi, de puritate dictionis Gr. Novi Testamenti, reciprocatae contentionis ferræ injiciam mentionem.

Cum dicendi genus in Novo Testamento adhibitum JOSEPHO JUSTO SCALIGERO non parum videretur differre ab aliorum Græcorum stilo, ideo primum eum fuisse observat beatus BUDDEUS, qui peculiarem loquendi formam peculiari quoque nomine designandam censens, dictionem Novi Foederis Hellenisticam vocaret. (d) Cumque ulterius progradientur DAN. HEINSIUS, dum non linguam tantum Hellenisticam, sed peculiarem ejus nominis gentem fingeret, Judæorum extra Palæstinam degenti-

um & Ebraistis ibi habitantibus oppositorum; (e)
 factum est, ut postmodum in eandem sententiam
 pedibus irent viri Doctissimi HUGO GROTIUS,
 CONSTANTINUS L' EMPEREUR, LUDOVICUS
 DE DIEU, aliquie cum primis & RICHARDUS
 SIMON Hist. Crit. Text N. T. (f), ubi iisdem fere
 verbis suam de Hellenistis sententiam exprimit, ac
 DAN. HEINSIUS, quod notat JOHANNES HEN-
 RICUS MAJUS (g). HEINSIO se summo studio op-
 posuit CLAUDIO SALMASIUS, idque egit, ut lin-
 guam illam Hellenisticam una cum Hellenistis pror-
 sus in exilium ageret. (h) Eum secuti deinceps sunt
 JOHANNES CROJUS, (i) cui HEINSIUS iterum
 apologiam opposuit. Porro MATHAEUS COTTE-
 RIUS, (k) aliquie, sicut nec defuerunt, qui pro
 HEINSIO contra SALMASIUM pugnarent. Verum
 neuter illorum, neque HEINSIUS neque SALMA-
 SIUS satis sanum de sermone græco N. Testamenti
 judicium tulit, quod non vacat fusius diducere. sicut
 & id jam ab aliis abunde præstitum est. BUDDEI de
 hac controversia, si requiras judicium, in meram
 tandem logomachiam eam abire censet. Etenim
 si Hellenisticæ linguae nomine nihil aliud intelliga-
 tur, quam lingua græca, cui Hebraismi admixti sint,
 putat nihil obstat, quo minus concedamus, dictio-
 nem N. Testamenti hoc sensu Hellenisticam dici
 posse. Verum, quod una manu videtur concedere
 vir magnus, id in mox sequentibus repetit. Sic e-
 nim habent verba ejus: *Si quis vero Hellenisticæ
 lingue nomine græcam corruptam, impuram, Barbaris-
 mis*

mis scatentem, designet; eum in errore versari & si
 non animum profanum, imperitiam tamen suam prode-
 re nulli prorsus dubitamus. Id autem Hellenisticæ lin-
 guæ assertores facere videntur; tametsi quidam apperti-
 ns hoc agant, Barbarismos & Soloecismos Scriptoribus
 N. Testamenti objicientes. De hac re acriter in Saxo-
 nia quoque dimicatum est, idque occasione litis cu-
 jusdam, quæ JOACHIMO JUNGIO cum quibusdam,
 speciatim JAC. GROSSIO Past. Hamburgensi, in
 qua eadem urbe JUNGUS, ut Rector, Gymnasio
 præerat. Hic Rector a nonnullis accusatur, nec, ut
 videtur, immerito, quod omnem moverit lapidem
 ad puritatem & castitatem N. Testimenti Græci sol-
 licitandam ac labefactandam. Cui controversiæ &
 multi alii implicati sunt, mireque Saxonum Eruditi
 circa hanc rem inter se dissenserunt. Wittebergen-
 ses, non Theologi modo, sed & Philosophi rem
 tandem, edito responso, deciderunt, quod ex Ger-
 manico, quale mihi ad manus est, ita habet: Das
 Soloecismi/ und nicht recht griechisch in der Apostel
 Reden/ und Schriften zu finden/ ist dem Heiligen
 Geist/ der durch sie geredet und geschrieben/ zu nahe
 gegriffen/ und wer die heilige Schrift einiges Bar-
 barismi bezüchtigt/ wie man heutiges Tages den
 Barbarismus zu beschreiben pfleget/ der begehet nicht
 eine geringe Gotteslästerung. (1) Hinc videmus has
 Facultates maximo omnium consensu in novo Foe-
 dore Græco, ut Ελασφριαν, rejicisse Barbarismos &
 Soloecismos, licet de Hellenismo, ut re nondum
 transacta, nollent sententiam pronunciare, ceu ex
 eodem

eodem responso, utut ipsa verba brevitatis studio
haud placuit afferre, patet. Mirum itaque non est,
si audacibus istis Hellenisticæ Linguæ propugnatori-
bus masculine se alii opponerent, Græcitatem N. Te-
stamenti puram acriter defendantes. Quibus exem-
plum circa annum Seculi decimi sexti 76:tum præ-
ivit HENR. STEPHANUS, quo N. suum Testa-
mentum edidit, eique Præfationem præfixit, ad ca-
stitatem styli Græci in eo tuendam, comparatam.
Recusa eadem est in Syntagmate HONNERTI, de
quo paulo post. Sequentibus temporibus hoc nego-
tium in se suscepit SEB. PFOCHENIUS, qui larva
fictitiis Hebraismis pluribus detracta, non levibus,
ut plurimum, fundamentis ostendere nititur Græcis-
sum N. Foederis puritate styli haud concedere Pro-
fanis auctoribus (m). Difficillimam hanc viam in
vindicanda a Barbarismorum & Soloecismorum for-
dibus Textus Sacri dignitate magna deinde cum
eruditio[n]is laude triverunt ERASMUS SCHMIDIUS,
BALTH. STOLBERGIUS, G. RAPHELIUS, GE-
ORG. CRAUSERUS, JAC. ELSNERUS, HONNER-
TUS. Hisce KIRCHMAJERUS addit ZACHÆ BO-
GANI HOMERUM ^{Eβερίσσωντα}, qui Oxfordiæ 1658
non 1655, ut vult FABRICIUS, seu notat idem,
KIRCHMAJERUM puta, lucem adspexit.

(a) Videantur Notæ ad N. Testam. Act. X. (b).
Observat. in N. Testam. Cap. XXXIV. (c) Cfr. STOL-
BERGII Tractat. Cap. V. §. I. pag. 46. (d) In Ani-
madversionibus in EUSEBIUM (e) quod facit in Exercita-
tionibus in NONNUM, itemque in Præfat. in Exercit. Sa-
cras

() 9 ()

eras in N. Testamentum. Porro & in Exercit. de Lingua Hellenistica & Hellenistis. (f) Cap. XXVII. p. m. 315.
(g) In Repetito Examine Hist. Crit. N. T. Cap. XXVII. pag. 361. (h) In Commentario de lingua Hellenistica; item in Funere Hellenistico, sive Confutatione Exercitationis de Hellenistis & lingua Hellenistica; ut & in Ossilegio, sive Appendix ad Confutat. Exercitat. de lingua Hellenistica.
(i) In Observat. in N. Test. Cap. XXX. seqq. (k) In Exercit. secund. de Hellenistis & lingua Hellenistica (l) Vid. JAC. GROSSIUS in Triade Prop. Theol. & MUSAEGUS in vindiciis pro Disquisitione de filo N. Foederis adversus JAC. GROSSII defensionem Triadis. (m) In Dia-tribe de Ling. Graecæ N. T. puritate.

§. III.

Sed ad HONNERTUM redimus. Nata est ei gravis cum ELIA BENOIST Ecclesiæ Gallicæ Delphensis ministro controversia de indole stili N. Testamenti, cuius hæc fuit occasio. Scripserat TACO HAO van den HONERT ad ABR. BODDENS Pa-
storem Ecclesiæ Amstelodamensis Gallo Belgicæ & qui-
dem anno hujus seculi primo epistolam, in qua, ut
BUDDEUS (a) refert, "suam de stilo N. Testamenti
sententiam ita exponit, ut adserat, illum, si ebra-
ismos, quibus quasi vocabulis artis utantur scri-
ptores sacri, exceperis, cum stilo DEMOSTHENIS,
AESCHINIS, XENOPHONTIS, de majestate & effi-
cacia, de puritate cum stilo scriptorum, qui cir-
ca tempora Apostolorum græce scripserunt, certare
posse; ebraismos vero nullo prorsus jure inter bar-

"barismos referri. In ista autem epistola cum non
 "nulla occurrerent, quæ in se dicta existimabat
 "ELIAS BENOIST, Ecclesiæ Gallicanæ Delphensis
 "minister; amicam expostulationem adversus epistolam
 "Taco Hajo van den Honert de stilo N. Testamenti in
 "lucem emisit anno MDCCIII. 4:to, in qua adserere
 "re non dubitavit, scriptores sacros plebejo dicendi
 "genere usos, elegantias & flosculos sermonis non
 "curasse, posseque citra injuriam in sacri codicis
 "fronterius, quam summa veneratione prosequatur,
 "iis barbarismos tribui ". Quibus adjungi possunt
 verba Consiliarii KIRCHMAJERI ex Gründliche Aus-
 züge etc. anni 1733 pag. 431: BENOIST schreib gar in
 einer Dissertation wieder HONNERTUM, Christus
 sey keines Weges unter die Gelehrten zu rechnen /
 seine Jünger wären auch nach denen erhaltenen Gas-
 ben des H. Geistes / unweise und ungelehrt geblie-
 ben / und hätten fehlerhaft und barbarisch geredet.
 Sed annon Christi scientia, etjam qua actum natu-
 ræ humanæ, ut Theologi loquuntur, adeoque finita,
 longissime superavit omnium reliquorum hominum
 cognitionem? cuius rei experimentum dedit Luc. II:
 46. seqq. Tum vero TACO HAO non amplius si-
 lendum aut nomen adversarii celandum sibi esse exi-
 stimans epistolam emisit de stilo N. Testamenti Græ-
 co, a barbarismis & sermonis vitiis ei nuper ab E-
 LIA BENOIST adfictis, vindicato; ubi &, ut ex in-
 scriptione ulterius liquet, "de vera purioris Helleni-
 "smi origine differit; commentitiam de ταν εὐδαιμο-
 "νίαν hellenismo opinionem explodit; stili N. Te-
 stamenti

“stamenti græci castitatem defendit etc”. Binæ istæ auctoris hujus Epistolæ una cum HENR. STEPHANI Præfatione, THEODORI BEZÆ, GEORGII PASORIS & J. G. STRAUBII commentationibus de stilo N. Testamenti Græco extant in Syntagmate Dissertationum etc. quod Amstelodami lucem adspexit A:o 1703. Ampliorem paulo collectionem A:o præcedenti dederat RHENFERDIUS sub nomine Dissertationum Philologico-Theologicarum de stilo N. Testamenti Syntagma. Parum abfuit, quin hoc loco præteriissem Virum magnum sane & doctrina excellentem, sed qui vel eo nomine satis doctis vapulavit, quod nimia sua sedulitate in immensum fere multiplicaverit varias in N. Testamento lectiones coacto tandem earum 30000 exercitu. De quo labore exstat GERH. van MASTRICHT judicium modestissimum hujus tenoris: *optima intentione stupendam hanc diligentiam impendisse virum Clarissimum neminem sinit dubitare ejus pietas & veritatis studium, qui hoc opere reipublicæ Christianæ prodesse voluit, attamen de se quaelis numerosissime hujus conlectionis & abusu non sat sollicitus mibi fuisse videtur; ne posset nimirum in gens ista farrago (quæ sine delectu omnes omnino colligere & referre voluit varietates, etjam insipidas, ridiculas & futilis) obesse testamento ac ejus fidei & auctoritati.* (b) Haud paulo acrius & durius est id, quod ferunt Critici nonnulli, rationibus ducti exceptione fere majoribus: male hoc opus a MILLIO Variantes Lectiones, cum debuisset Variatæ, inscribi, quippe cum sua manu non raro textum præc-

puum emendaverit. Conatum hunc inconsultum graviter redarguit DAN. WITHBY (c). Sed haec in transcurso. Magis ad hunc locum pertinet ejus in ~~σολοεκισμόν~~ S. paginæ valde injuria opinio, quæ legitur operis memorati p. 21: *Certe Apocalyptic subinde minus Grace scribere, etiam σολοεκισμόν, notius est, quam ut negari posit.* Sed annos & ceteri plerique N. Testamenti Scriptores? Vid. ANT. BLACKWALLUS in Auctoribus Sacr. Classic. defensis. Tom. I. P. I. de Soloecismis N. T. delendis §. 8. pag. 123.

(a) Ifag. pag. 1498. (b) Proleg. N. T. pag. 26. (c) In Examine Variantium Lectionum JOH. MILLII.

§. IV.

Vel me non monente, quilibet facile perspicit, arcte connecti quaestionem de Barbarismis & Solœcismis sive V. sive N. Testamenti cum illa de ~~σολοεκισμόν~~. Etenim, si illa, ceu in tota Ecclesia Lutherana explicari solet, rite concipiatur, ut ad illam referatur non suggestio tantum mandati ad loquendum & scribendum una cum inspiratione sententiarum & rerum, sed præterea etiam suggestio verborum, sic ut verba quoque, quibus, res Sacrae exprimenda erant, in mente Ammanuensium a Spiritu Sancto immediate producta sint; In infinitum a codice sacrae relegandi sunt Barbarismi & Solœcismi. Verum

Verum quidem est, si MOSHEMIO fides adhibenda,
 quod cum B. MEGALANDER, LUTHERUS, tum
 cum illo nonnulli alii nostræ Ecclesiæ Theologi do-
 cuerint ac etjamnum doceant: Veritates quidem Di-
 vinæ seu materiam Scripturæ, per ΘεοΦορίαν inditas
 mentibus scriptorum, minime vero voces earumque
 constructionem. Verba doctissimi viri (a) ita fluunt:
 "Multi, in primis doctores ecclesiæ nostræ, non modo
 "omnem materiam S:æ S:æ sed etjam formam Spiri-
 "tui Sancto tribuunt. At sunt tamen in ecclesia no-
 "stra nonnulli, qui secus sentiunt, & docent, Spiri-
 "tum S. tantum materiam S:ræ S:ræ inspirasse, sed non
 "formam. Esto propositio: *Fides sola justificat;* Hæc
 "veritas a Spiritu S. proficiscitur, & forma ejus a S.
 "Paulo. Hujus sententia in nostra ecclesia Auctor
 "est ipse Lutherus, qui in nonnullis locis scripto-
 "rum suorum clare fatetur, Spiritum S. modo ma-
 "teriam inspirasse. Præcipue Theologi seculi XVI
 "hanc sententiam habuere. Sed hæc sententia a non-
 "nullis Pontificiis in defensionem propositionum sua-
 "rum trahebatur. Hanc enim Pontificii conclusionem
 "fecerunt: Si Spiritus S. materiam tantum inspira-
 "uit, fieri potuit, ut Prophetæ & Apostoli in enun-
 "ciando & scribendo erraverint, & satis luculenter
 "propositiones & veritates inspiratas a Spiritu S. non
 "proposuerint. Inde concludebant: necessarium ergo
 "est, ut Scripturæ S:æ aliud principium (traditio
 "scilicet) adjungatur. Quum ita concluderent Pon-
 "tificii, Theologi nostri deserebant Lutheri senten-
 "tiam, & sub finem seculi XVI ac initium seculi

"XVII hanc sententiam assumserunt: Sacram scri-
 pturam non modo quoad materiam, sed etjam
 "quoad formam a Spiritu S. inspiratam esse. Hæc
 "sententia primo in Saxonia eriebatur, & deinde
 "per totam fere ecclesiam dilatata est. At supersunt
 "tamen quidam Theologi, qui sententiam Lutheri
 "dimittere nolunt." Ante mota certamina securius
 locuti sunt Patres, habet tritum sermone proverbii.
 um. Idem de *Luther*o judicare licet. Si enim præ-
 videre animo vir Beatus potuisset, quæ ex sua illa
 thesi illaturi essent, non modo *Papicole*, sed nostri
 imprimis ævi *Antiscriptuarii* quivis, præcipue Na-
 turalistæ, ut alios prætermittam, profecto aliter sen-
 sisset nec incautius, Patres quosdam Celebres, ceu
 vix dubitandum, fecutus fuisset. Ut vero clarius pa-
 teat S. pandectas non minus Barbarismis, quam So-
 lœcismis vacare, abs re non fuerit, quædam præ-
 mittere. Barbarismus est *expressio vocabuli vitiosa ex*
ignorantia pendens. Hic & loquendo & scribendo
 committi potest, dum vox aliqua peregrina, aut non
 eis litteris vel sono exprimitur atque enunciatur,
 quo ab eis, qui ante nos locuti sunt, expressum e-
 nunciatumque est. Solœcismus vero est *vitiosa con-*
structio vocum ex eadem caussa orta. Committitur
 cum verba non ea lege sibi coaptantur, qua coa-
 ptaverunt, qui priores nobis non sine auctoritate ali-
 qua locuti sunt. Quo etjam tendit AUGUSTINUS,
 (b) nisi quod caussam omittat puta ignorantiam.
 Vitiosa utraque appellatur, quatenus consuetudini
 legendi, scribendi vel construendi lingvæ illius peri-
 torum

2) 15 (3)

torum & inde pendentibus regulis Grammaticis ad-
versatur. In strictiori sensu sic accipiuntur voces,
latiori vero Barbarismus sic sumi potest & sumitur,
ut quicquid a recta via deviat in lingvis, adeoque
& Solœcismos, suo ambitu complectatur. Hinc non
difficulter tale necitum ratiocinium: Cum ob o-
mniscientiam DEus & Spiritus ejus omnes lingvas
perfectissime calleat, id quod extra omne plane dubium
est, & vero Ammanuenses Sacri Ejus specia-
lissimo & plane extraordinario concursu, in scri-
bendo S. Codice gavisi sint, quo ipso longe majo-
rem perfectionem & copiam in qualibet lingva sibi
necessariam momento temporis acceperunt, quam
alioquin ullus mortalium vix sibi toto vitæ inter-
vallo acquirere potest, summo jure Scripturam S. ab
omnibus tam Solœcismi, quam Barbarismi fôrdibus
liberamus. Si Apostoli impositione manuum aliis
lingvarum excellens donum contulerunt, (c) quo-
modo eo non polluissent ipsi? Et si vel maxime lo-
ca quædam in N. T. Græco occurrerent, quæ a
more scribendi Græcis recepto recederent, neutquam
id tamen ab ignorantia scriptorum, multo minus i-
psius Dei inspirantis, qui Auctôr & Conditor est
Lingvarum, derivandum, sed aliis rationibus sapien-
tissimis, licet nobis vel occultis, adscribendum effet.

(a) In Elem. Theolog. Dogmat. (b) Vid. Lib. II. de
Doctr. Christiana Cap. 13. (c) Evolvatur Act. XIX: 6.

§. V.

Ad promissi fidem, in rubro Dissertationis datam, erat quidem animus jam de Cilicismis S. Pauli impactis, nonnulla disputare, quod quo minus in hac opella fiat, dabis, Humanissime Lector, temporis penuriæ. Id autem Te eo lubentius facturum spero, quo certius mihi promisit Celeberrimus

Præses daturum se operam, ut alias quis in argumento illo elaboret.

S. D, G.

